

ZELANDE.

Environ l'an de nostre salut huit cens soixante huit, l'Empereur Charles le Chauue, à l'instance & requeste de son frere, Loys Roy d'Allemagne, donna en fief perpetuel à Thierry premier Conte d'Hollande, pour luy & ses successeurs, la solitude, ou desert, & tout le terroir circonuoisin: lequel estant purgé & cultivé, fut appellé Zelande. Ce terroir, ensemble l'Hollande, sont faitz la iurisdiction du Conte Thierry, (qu'estoit de la maison & race des Roys de France) & de ses successeurs. Mais defaillante sa ligne masculine, il est escheu au Conte de Haynault: puis au Duc de Bauiere: apres au Duc de Bourgoigne: & pour le dernier à l'Archiduc d'Autriche, comme plus amplement est déclaré en la description d'Hollande.

La Conté de Zelande, est vne des dixsept Prouinces Beligiques, située entre Flandres & Hollande, ayant pour limitrophes, vers Ouëst la Mer Oceane, vers l'Est la Duché de Brabant. Ceste Prouince est circonuëe de la mer, & par la mer diuisée en plusieurs Isles: desquelles sept s'ont les principales: Qui par le fleuuel l'Escault, decoulant à l'Occident d'Anuers (ville marchande la plus renommée de l'vniuers) sont diuisées en deux parties. Car les trois, qui sont du costé Oriental de l'Escault, nommement Schauwe, Duuelande, & Tole, sont appellées Zelande Beosterschelt. Les quatre autres du costé Occidental dudict Escault, à sçauoir, Walchele, Sudbeuelande, Nortbeuelande, & Wolfartsdique, ont le nom de Zelade Bewesterschelt. Le terroir est tresfertile de bon Fourment: lequel transporté es autres prouinces, est estimé pour le plus excellent. Vn arpent de ceste terre, vaut deux de celle de Brabant. La Guarance croist si copieusement en Zelande, qu'elle en fournit presque toute l'Europe. L'air y est rude, & malsain: le bois y est rare, & n'y a point d'eau douce. La matiere de feu, sont Tourbes. Ceste prouince est si subiecte aux tempestes & orages de la mer, que souuentefois est en bransle & dangier de perir. Car la mer inuade aucunesfois les dyques de telle furie, que non-obstant toute humaine resistance, les perce, rompe & discipe, & inunde la terre, faisant d'une Isle, deux: aucunesfois aussi de deux Isles, vne, par le sablon que le flux de la Mer y amene. Qui est cause que rié se peult dire qui soit ferme, de sa Topographie. Car ce qu'aujourd'hui est dict à la verité, peult estre (helas) que lendemain sera menty: & ou maintenant sont deux villes, demain par aduenture n'y sera qu'une ou nulle: & aujourd'hui se fait la chasse, puet estre que de brief on y peschera du poisson. *Lanius Lemnius* tesmoigne, qu'à la memoire d'homme, soyent engloutis de la Mer, plus de cent mille arpents de terre. Car environ l'an de nostre salut, mille cinq cens & trente, sont esté par vne horrible tempeste, esmeue du vent de Nordouëst, fort endommagéz, non seulement ceste prouince, mais aussi autres lieux, tant en Brabant, qu'en Flandres. Car les vndes marines s'enflerent de telle sort, qu'elles passerent par dessus les dyques, inundans & engloutissans aucunes Isles, Bourgades & Villages, ensemble tous les habitans, tout grand & menu bestail, & tout ce qu'y estoit: & aussi les villes de Catz & Cortgien.

La Comté de Zelande contiét dix villes, de murailles & fossez bien munies: à sçauoir Middelbourg, Flisinge, Camfer, & Armude, en l'Isle de Walchere: Ziricé & Brouwershaue, en l'Isle de Schauwe: Tole & Dyque S. Martin, en l'Isle de Tole. Outre cesdictes villes, elle contiét beaucoup de Bourgades, pourueues de droictz municipaux & priuileges, comme les villes: & aussi cent & deux villages. Middelbourg est ville capitale de Zelande, & lieu ordinaire du Conseil de Zelande. Plus, s'y est l'estaple de toute sorte de vin, qui vient d'Espagne, France, Portugal, & autres prouinces outremarines. Flisingue est ville maritime, laquelle ces vingt & cinq derniers, tant à cause de la nauigation, que de son port bien commode, aussi par les faitz de guerre; à augmentée son renom en plusieurs prouinces.

A Armude, le gros Sel, y amené en grande quantité de France, Portugal & Espagne, se purifie, & cuit bien blancq, lequel de la se transporte, vend & distribue, en plusieurs autres Royaumes & Prouinces.

Les habitans de ceste Prouince, exercent la nauigation & la pescherie, par telle diligēce, qu'ils fournissent l'Angleterre, qui est environnée de la Mer (chose admirable) de poisson, selon la necessité. En outre ils cuisent & purifient en plusieurs endroictz (ainsi que dict est d'Armude) le gros Sel, lequel on y vend à grande quantité. De maniere que tant du Sel & poissons, que des choses que leur terroir produict; comme sont Fourment, & Guarance, ils acquierent grands biés & richesses. Car (ainsi que dict *Lanius Lemnius* de Ziricé) ils sont de leur naturel fort adonnez au gaing, & à amasser beaucoup de biés: aussi cauteleux & subtils; parquoy ne peuuent legerement estre deceus par les ruses & practiques d'autruy. Ceste nation a l'origine d'un Isle en Dannemarche, dicte Zelande, de laquelle est ville capitale & siege Royal, Coppéhaue: d'ont plusieurs presument, que pour l'amour de leur partie, ilz ont aussi appellé ceste Isle Zelande.